

COMUNU DE SIAMANNA

Prov. de Aristanis

**ISTATUTU
BIBLIOTECA COMUNALI**

§§§§§§§§§§

Aprovau cun delibera de su C.C. n°63 de su 30.10.1997 e mudau cun delibera de su C.C. n°49 de su
21.10.2004

Art. 1

In Siamanna ant costituiu una Biblioteca pùblica, chi pigat su nòmini de “BIBLIOTECA COMUNALI” e est de propiedadi de su Comunu de Siamanna.

Po su funtzionamentu, po impreai a su mellus arresursas umanas, instrumentalis e finantziàrias, s’at giai prioridadi a sa gestioni in assòtziu cun àterus Comunas acanta e/o àterus Entis.

Art. 2

Sa Biblioteca Comunali tenit s’iscopu de fruniri a totu is citadinus, sena de fai pagai e sena limitazioni peruna, unu servìtziu modernu pùblicu po ligi, comenti a aina primària de formatzioni e ammannamentu culturali e ispirituai.

In mesu a totu, sa Biblioteca mirat a:

- a) - fruniri unu servìtziu culturali de agiudu a s’iscola de s’òbrigu. S’ant a incorai duncas is acòrdius chi serbint cun is istituzionis iscolàsticas po favoressi maistus e alunnus a s’impreu prus profetosu de sa Biblioteca;
- b) - essi, po sa genti chi at acabbau s’iscola de s’òbrigu, una possibilidadi de isvilupu e aggiornamentu de sa cultura insoru;
- c) - donai po su prus a totu is citadinus sa possibilidadi de un’aggiornamentu fitianu tècnicu e professionali;
- d) - acumentai s’abisòngiu de imparai e de isciogai de totu is categorias de citadinus e essi un’alternativa chi serbit a àteras ocupatzionis de su tempus liberu;
- e) - essi comenti si siat unu centru abistu po ispaniai sa cultura, finas, mancai, cun s’agiudu a manu de pari cun is bibliotecas de is biddas acanta.

Art. 3.

Sa Biblioteca fait servìtziu po ligi in sa sea e su de imprètidu inderetura a domu. Faroressit, in prus, cunferèntzias, atòbius, dibatas, ammostas, auditzionis, proietzionis de filmis e ònnia àtera faina chi torrat paris a is interessus de su pùblicu chi ddui andat e chi serbit a ispaniai sa cultura.

Art. 4.

A is ispesas po fai funtzionai sa Biblioteca s’at a parai faci:

- a) - cun is fundus chi s’Amministratzioni Comunali s’assuntat de poni a disponimentu de sa Biblioteca ònnia annu e chi s’ant a podi cresci cunforma a is abisòngius de s’Istitutu e a sa situatzioni de bilànciu de su Comunu;
- b) - cun is cuntributus de s’Istadu e de sa Regioni;
- c) - cun is donatzionis e cun cuntributus chi Entis pùblicus e citadinus privaus ant a fai po custu.

Art. 5.

Su Comunu s’at a incurai de fruniri domus idòneas e bastantis mannas po sa sea de sa Biblioteca, futas finas po fai is fainas chi funt me in is artt. 2 e 3.

Art. 6.

Sa Biblioteca dda sighint segundu is inditus chi frunit una Cummissioni de Vigilàntzia fata de:

- Su Responsàbili de su servìtziu biblioteca- Presidenti;
- Su Responsàbili de is procedimentus sòtziu-culturalis ~ cumponenti cun funtzionis de segretàriu chi ponit a verbali;
- 2 rapresentantis de is Istitutus de istrutzioni locali: 1 po s’Iscola Elementari e 1 po s’Iscola Mèdia ~ cumponentis;

- Unu tècnicu espertu chi ddu nòminat sa Giunta Comunali – cumponenti.

Art. 7.

Is càrrigas e is funtzionis de membru de sa Cummissioni ddas faint a indonu.
Sa Cummissioni di Vigilàntzia arruit a s'iscadèntzia de su mandau de su Contzillu Comunali.

Art. 8.

Funzionis de sa Cummissioni de Vigilàntzia:

- Inditus e parris a su programma a s'annu de sa biblioteca e de is fainas chi proponint is incarrigaus a su servitziu e a is critèrius po dda fai funtzionai;
- Inditus e parris po coberai materiali audiovisivu e libràriu;
- Inditus e parris po impreai s'àula multimediali;
- Propostas a is òrganus comunalis chi cumpetit;
- Relatas de andamentu de su servitziu: si mandat a sa relata a s'annu de riecuilbriu e de contu consuntivu de su Bilànciu.

Art. 9.

De totu is mòbilis e immòbilis chi funt de sa Biblioteca tocat a isterri un'inventàriu patrimoniali segundu is normas amministrativas e cuntàbilis in vigori.

Is liburus, is catàlogus, is iscafalis, **is computèrus e is mòbilis** cosa sua funt de carculai comentu a benis immòbilis de destinatzioni. S'inventàriu insoru est fatu de registru cronològicu de intrada.

Is materialis comentu si siat coberaus po sa Biblioteca cun ispesas, cuntributus e sussidius de s'Amministratzioni Regionali e de su Ministeru de s'Istruzioni Pùblica, aici comentu torrante de is inventàrius de sa Biblioteca, innui s'at a inditai a craru de anca ndi arribant, apoderant in ònnia modu sa punna insoru ispecifica e abarrant de propiedadi de su Comune.

Art. 10.

De totu is relatas fatas fadendi su riecuilbriu e su consuntivu a s'annu, in contu de fainas e funtzionamentu de sa Biblioteca in s'annu passau, de is arresurtaus otentus e de is prospetivas po melliorai e ammanniai su servitziu, s'at a mandai còpia a s'Assessorau Regionali a s'Istruzioni Pùblica e a sa Subrintendèntzia Bibliogràfica.

Art. 11.

Sa nòmina de su Responsàbili de sa Biblioteca si fait in mesu a totu is responsàbilis de is Servitzius isceraus cunforma a is normas in materia in vigori.

Art. 12.

Su Responsàbili de sa Biblioteca tenit de castiai totu su materiali cosa sua e est responsàbili alloghendì-ddu e amministrèndi-ddu. In mesu a totu est responsàbili de apoderai beni is registrus e is Catàlogus e de fai funtzionai totu is servitzius de s'Istitutu chi dd'ant incarrigau.

Art. 13.

Su Responsàbili de sa Biblioteca s'at a podi fai agiudai in s'incàrrigu suu de àteru personali chi su nùmeru e mansionis s'ant a decidi segundu sa lei cunforma a s'isvilupu chi sa Biblioteca at a pigai in su tempus.

Sa gestioni de su servitziu biblioteca s'at a podi afidai a personali istràngiu a su Comune, mellus a Cooperativas Giovanilis, chi depit fai su servitziu sighendi is inditus e su coordinamentu

de su responsàbili de sa Biblioteca, atendendi a totu su chi est de fai po sa gestioni giusta de su servitziu.

Su servitziu de sa Biblioteca a s'inghitzu dd'at a gestiri una Cooperativa o Sociedadi giovanili.

Art. 14.

Sa Biblioteca at a funtzionai segundu is normas chi ddui funt in s'allegau Regulamentu de funtzionamentu de su servitziu.

Art. 15.

Custu Istatutu est de n. 15 artìculus e apustis chi dd'aprovat su CO.RE.CO. s'at a publicai in s'Albu Pretòriu e intregau a is Contzilleris, a s'Assessorau Regionali chi cumpetit e a is Istitutus localis de istrutzioni.